

**HEADLINES ( EVENING )**

1. State Election Commissioner Dr H. Lalthangliana'n Aizawl Municipal Corporation (AMC) inthlan chu April emaw May thlaah emaw buatsaih theih an beisei a ti.
2. India leh Myanmar ramri hung duh loh lantirin vawiin khan MZP leh ZORO te Aizawl Vanapa Hall kawtah an pungkhawm.
3. Prime Minister Narendra Modia chuan Startup India Programme chu scheme mai niloin sector hrang hrang thlunzawmtu Rainbow Vision anih thu a sawi.
4. United States chuan Iran-in lungawilohna lantirte tharum hmanga khap beh a tum chu dang turin kawng awm zawng zawng a ngaihtuah dawn tiin a vau.

<><><>

**SEC**

State Election Commissioner Dr H. Lalthangliana'n Aizawl Municipal Corporation (AMC) inthlan hun tur a sawi chian theihloh tih sawiin ruahman dan chuan kumin April emaw May thlaah emaw inthlan theih an beisei a ti.

Vawiin khan Dr H. Lalthangliana hian a Pisa-ah Chanchinbu mite kawmin State Election Commissioner chuan, February thla a Assembly Session neih tur chu Budget Session a nih bakah sorkar tangka kum kal lai tawp hun a hnai a, sorkar hnathawk an buai vanglai a ni tih sawiin, tun dinhmuah sorkar hnathawk te chu inthlan buaipui tur a pawhpen an nih chuan nghawng a neih nat dawn avangin kumin March thla hma chuan AMC inthlan a remchang lo niin a sawi bawk.

State Election Commissioner Dr H. Lalthangliana chuan mipui leh political party lamin inthlan an cho tawh a, thu lawmawm lam ni mah se Aizawl khawpui chauh ni lo Mizoram pum ngaihtuah a ngaih avangin sorkar hnathawk buai vanglai taka inpawhpen chuan harsatna a thlen thei a, tun hma pawhin AMC chu a hun pangngai takah an la inthlang ngai lo tih a sawi bawk.

AMC term kal mek hi kumin March ni 1-ah a tawp tawh dawn a, political party hrang hrang ten an party candidate tur te an puang tan tawh a. Inthlan atana hman tur Electoral Roll pawh January thla tir khan tih chhuah a lo ni tawh bawk a ni.

<><><>

**CM**

Chief Minister Pu Lalduhoma'n Mizorama rawn zin mek DoNER Secretary Pu Chanchal Kumar chu a pisa ah kawmin Ministry of DoNER kaltlanga Mizoram hmalakna hrang hrangte a sawipui.

Chief Minister hian Ministry of DoNER-a Mizoram sorkar project inchiah mekte chu a rang lama chin felsak turin a ngen a. Sum sanction chhung rei thin chuan hnathawhna lamah nghawng a neih thin avangin tihtawi dan ngaihtuah a tul thu a lo hilh bawk.

Pu Chanchal Kumar hian Mizoramin tun hnaia Sawhthing Processing Unit a nei thar chu a lawmpui thu Chief Minister hi a hrilh a. Sawhthing chu Mizorama loneitu tam takte inngahna a ni a, an tharchhuak tam chho zel tih sawiin a sawngbawl dan chu DoNER Ministry in a ngaipawimawh hle tih a sawi.

<><><>

**MZP&ZORO**

India Sorkar-in India leh Myanmar ramri hung a tum duh lohna lantirin vawiin khan Mizo Zirlai Pawl (MZP) leh Zo Re-Unification Organisation (ZORO) te Vanapa Hall kawtah an pungkhawm.

Vanapa Hall kawta hun hmanah, ZORO President Pu R. Sangkawia chuan, ramri hung chu Zofate then hrang thei tu leh inunauna ti chhia a, chimrala awm theihna niin a sawi a. Mizoram sorkar pawhin Border Fencing a duh lohna thu a pass tawh tih sawiin, an thu pawm tawh chu mipui pawhin hria se a duh thu a sawi bawk.

Pu Sangkawia chuan ramri hung chu rilru leh taksaa unau inthen hlenna tur a ni a ti a, Ramri hung hian ruihhlo a harsatna a sutkian a rinawm loh a, buaina tawh tur nen a man lo hle ang a ti bawk.

ZoRO President chuan, Mizoram state sawrkar-in, ni 28 February, 2024 khan Border Fencing duh lohna official resolution a siam chu vawiin thlengin thiah a la ni lo tih sawiin kengkawh zel turin sawrkar an ngen a, an thlawp tlat dawn a ni a ti bawk.

MZP President Dr C. Lalremruata chuan, Zofate rorelna pakhat hnuai a awm an ngaihtuah laia ramri hung tum a ni chu tha an ti lo tih a sawi a, ramri awm mah se thilung a in unauna chu daidan theih a ni lo tih sawiin Border Fencing chu a tawp thlengin an do dawn tih a sawi bawk.

MZP leh ZORO hian vawiin tlai vek khan, Prime Minister Pu Narendra Modi hnenah Border Fencing ngaihtuah nawn tura ngenna lehkha Mizoram Governor kaltlangin a theh lut a. A copy hi Union Home Minister an pe bawk.

<><><>

## **JOB FAIR**

National Institute of Electronics and Information Technology (NIELIT) buatsaihin vawiin khan Aizawl Millennium Centre chung zawlah NIELIT Job Fair 2026 neih a ni.

Labour, Employment & Entrepreneurship Department (LESDE) Secretary Dr Lalhriatzuali Ralte chuan he hun hi hmanpuiin, Mizo thalai ten IT lamah theihna sang tak an nei a, mahni inkiltawih mai loin thiamna sang zawk hai chhuak turin thalai ten theihtawp an chhuah a pawimawh tih a sawi.

NIELIT Job Fair 2026-ah hian tualchhunga Private Firm hrang hrang hrang an thu a, anni hian an hnena hna thawk tur zawngin Lehkathiam hna la hmu lo ten interview hmachhawnin a theih angin hna pek an ni.

<><><>

## **DGP**

Director General of Police Pu Sharad Agarwal chuan vawiin khan Siaha Police Station tlawh in, station-a hnathawh dan hrang hrang te a enpui a.

DGP Pu Sharad Agarwal chuan FIR an ziahluh dan chu uluk zawka kalpui a ngaih thu sawiin FIR file hnuah Register-a ziahluh nghal zel a ngaih thu a sawi a, Siaha Police Station Building chu a tha hle a mahse an hman tangkai thiam tawk lo thu leh Room hrang hrang awm te hman tangkai a pawimawh thu a sawi a, thawktute chu tan la zual turin a chah nghal bawk.

Station a enfiarna zawh hian DGP chuan Police Station Conference Hall ah thawktute kawmin Siaha Superintendent of Police Pu Manjeet Singh Sankhla chuan Siaha District chungchang chu Powerpoint presentation hmangin a sawifiah a, hmasawna tur hrang hrang sawiho a ni bawk.

DGP hian Police Station building bakah Traffic Police Office leh SP office pawh tlawh in a enfiarh nghal bawk.

<><><>

## **BJP G RAM G**

BJP Lunglei Dist President Pi R. Lalbiaktluangi chuan ni 100 inhlawhna MGNREGS thlakna Viksit Bharat G RAM G chungchang Lunglei-a thuthar thehdarhtute hmaah a sawifiah a

Pi R.Lalbiaktluangi chuan MGNREGA kha kum 20 Chuang India ramah kalpui a ni a, mipuiin an hmang tangkai a, PM Pu Modi a kaihhruai BJP Sorkar pawhin kum engemawtichen a kalpui a, mahse a aia tha zawk leh felfai zawk a kalpui tur te, belh ngaite belhin G Ram G chu a lo duang chhuak ta a ni a ti.

G Ram G chu Vikshit Bharat kalpui mekah hmasawna tluantling a awm theih nan kalpui a ni tih sawiin he scheme hi hmeichhia leh tar chaklo tan pawh a tangkai dawn a, VC te pawh hman tangkai an ni ang a, kum 1 ah ni 125 inhlawhna a awm dawn a, ni 60 chu buhseng lai vel a chawlh nan hman tur a ni a ti a, hnathawh hkan loh pawhin hlawh hi an lo la lawk thei ang a ti. NREGS hunlai a diklo tak a sum hmanna

phuahchawp ang mai mai kha a bo tawh dawn a, Internet hmangin finfiah theih vek a ni tawh ang a ti.

He hunah hian Pu K..Vanlalvena,Vice President BJP pawhin G RAM G hi Khawvela India mipui diktaka phochhuahna tur leh rethei zawk te intuamhlawmna tur a ni tih sawiin minimum wages zat tur hi la sawi theih ni lo mahse Economy a zir zel a sang a hniam tur a nih a rinawm a ti.

Vawiin vek khan BJP Mizoram State OfficeAizawl ah VB-G-RAM-G Scheme thar zir hona hun neih a ni.



#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.



#### MPCC

Mizoram Pradesh Congress Committee MPCC Vice President Pu C Ngunlianchungan istrict Council ah ZPM in BJP tel lovin sawrkar an siam ngamlo a ti.

Vawiina Aizawl-a Congress Bhavan Political Sessionah thusawiin Pu Ngunlianchungana chuan LADC ah MNF leh ZPM in sawrkar siam tum in thuthlung an ziaak a, chawlhkar thum a ral hnuah pawh Governor office atangin engmah hmalakna a awm loh avangin MNF lam chuan ZPM hotu lu lamin sawkar siampui turin an duh lo ni a ngaiin Congress chu sawrkar siampui turin an sawm ta zawk a ni a ti a.

ZPM sawrkar chuan BJP an hlau hle a ti a, Governor pawhin a ngai pawimawh vak lo niin a lang a ti. ZPM chuan Governor Office atangin file pawh an nawr chhuak hlei thei lo a, Council of Minister ten CADC chungchanga an thurel pawh engahmah ngai lovin CADC sorkar a suspend chhunzawm zel tih sawiin ADC sawrkar a tluk chuan Governor in administrator an ruat thin a, tunah hian adminiaturator tumah ruat an ni lo a, regular a thawk ten hlawh mumal pawh an la hlei thei lo a ni a ti.

District Council inthlan hi Mizoram sawrkar hmel lanna tih a nih thin laiin LADC inthlanah ZPM chuan seat 6 chiah an la thei a, rorel lai party in chutiang zat lek seat an la ngai lo a ti bawk.

Pu Ngunlianchungana chuan Chief Minister chu thudiklo sawi thinah puhin sawrkar hmasa te sum bat cheng vaibelchhe 6311 an rul tawh a, anni chuan leiba hnutchhiah an tum ve lo ti a Chief Minister sawi chu chhangletin cheng Vaibelchhe 6311 chu tu hnenah nge an pek tih a zawt a, Administrative Approval a awm em tih leh Expenditure Sanction a awm em tih zawtin, tun sawrkar hian engang pawhin kal dik tum se a leiba pek bang a nei ngei dawn a ni a ti.



#### PM

Prime Minister Narendra Modia chuan Startup India Programme chu scheme mai niloin sector hrang hrang thlunzawmtu Rainbow Vision anih thu a sawi. Vawiin khan New Delhi-a National Startup Day lawmnaah he thu hi sawiin Pu Modia chaun Startup India Mission chu kum 10 chung lekin inthlak danglamna ropui tak thlentu anih thu leh ramchhunga nunphung rawn thlak hlawk thei a nih thu a sawi a. India chu khawvela startup ecosystem-a ram lian pathumna anih tawh thu a sawi.



#### US ON IRAN

United States chuan Iran-in lungawilohna lantirte tharum hmanga khap beh a tum chu dang turin kawng awm zawng zawng a ngaihtuah dawn tiin a vau. Nizana United Nations Secutiry Council Emergency Session New York-a neihah US palai Mike Waltz chuan he thu hi sawiin US President Donald Trumpan lungawilohna lantir avanga mante tihlum an nih loh nan kawng awm thei zawng zawng a ngaihtuah dawn a ti bawk. Hetihlai hian Iran Deputy Permanent Representative Gholamhossein Darzi chuan chetlakna engpawh awm se huai tak, awmze nei leh dan hmanga chhanlet an ni ang tiin a vau let a ni.

